

# QUÆSTIO MEDICA,

*Cardinalitiis disputationibus manè discutienda in Scholis  
Medicorum, die Jovis vigesimâ sextâ Februarii 1711.*

M. JOANNE-BAPTISTA DOYE,  
Doctore Medico, Præsîde.

*An à cibo non tuta cogitatio?*

## I.

**A**NIMUM hominis ex altissimo domicilio depressum esse quis neget? cùm de rebus suprâ naturæ fastigium evectis sentiat, cùmque principia rerum & causas causarumque prægressus & antecessiones exploret. Quis non arguat immortalē? cùm rebus præsentibus adjungat atque annectat futuras. Quidni & ab ipsius Dei naturâ delibatum esse fateamur? cùm pudoris atque verecundiæ particeps, cùm justus, mansuetus, beneficus, prudens; cùm innumeris dotibus ornatus videatur, quæ nihil terreni sapiunt, divinamque planè spirant intelligentiam. Odi prophanos, pseudosophos arceo qui suæ dignitatis æstimatores malè conscii, animum quem ex divinitate hausērunt elementarem esse pronunciant; nolim concentum, harmoniamve, symmetriamve nolim definiri. Imò neque dixerim animum esse *ὁπτελεχέαν* corporis organici, quod non aliundè quàm à fluidorum motu vitam habere crediderim. Munus animi cogitare est & intelligere, cui muneri corpus multum officit, ut officiunt opaca cælesti lumini.

**E**XCOGITARE artes, scientias excolere, percipere superos, jucundissima est animi voluptas & exercitatio. Nihil hunc absterret aut impedit magis quàm alimentorum in ventriculum ingestio, à quibus vel moderatè sumptis prohibenda omnis cogitatio est, sicut & prohibenda sunt pleræque corporis motiones; nam à cibo nocet equitatio, nocet quævis saltatio, nocent choreæ, nocet venus. Prodest fortè levis ambulatio, sed otium segne labore aspero securius est, quin & indulgere somno quàm acriter vigilare est satius. Coctio ipsa per somnum quàm per vigiliam semper est felicior. Ingesto cibo stringitur ventriculus, horret corpus extimum atque contremiscit; an quòd tanti sit momenti prima coctio, natura ut hujus unius operis gratiâ colligat à partibus amotissimis omne robur suum? affluunt præsertim per nervos spiritus actuosissimi fermentorum *crep-  
vclav* promoturi. Hos si retines tradenste cogitationi, quid detrimenti non patitur coctio? sed & quid vitii non experitur ipsa cogitatio? quæ nec firma nec tuta sic unquam est, propter distractos, vel te invito, partim aliò satellites. Quidni & propter in ventriculo succussionem nervorum à fermentorum vi cerebrum subinde conjiciamus convelli, mentis unde cogitationes non sint tutæ,

## III.

**V**IRES animi omnes simili sorte afficiuntur dum agunt in cibos fermenta. Nam quidquid percipit ingenium, quidquid judicium volvit, quidquid coërcet memoria, percipiatur, volvatur, prodeat in lucem ut faciliè, requiritur cerebri nitor, sanguinis ad ipsum appulsus lenis, & viscerum inferiorum placida dispositio. Verùm ab evolutione ciborum viscera turbantur & sanguis, obnubilatur caput;

& ingenium caligat, hebescit iudicium, memoriaque torpescit. An quosvis obices mens fervens cogitationibus aspernari amat gaudetque perrumpere? tum propter vim quam infert, incandescit sanguis, subsequiturque corporis universi confusio, mentisque ipsius non tuta cogitatio. Scilicet ea lex est nostris coæva primordiis, ut pro modulis solidarum fluidarumque corporis partium videantur inverti mentes, undè etiam nulla ferè nisi sano in corpore deprehenditur sana. Sanè si scrutemur animorum morbos, malè morata sæpè arguunt viscera. Ab alimentorum autem ingurgitatione crebrâ fato fatiscunt ut plurimum immaturo.

## I V.

**D**E helluonum comestationibus non meus hic sermo est, aut de ebrietate quam vel semel unoquoque mense probare non est sapientis; quæ totum corpus oppriment, subvertunt, dejiciunt, atque affligunt humi divinæ particulam auræ. A vino imprimis offenditur cogitatio. Aqua potus esto prudentum, & eorum omnium qui sedulo incumbunt libris, negotiisve quæ distendunt mentem. Hos spectat dogma nostrum quos tangit honoris simul & suæ sanitatis cura. Hi aurorâ micante musis amicissimâ, hesternâ cœnatione, multò leviorè quàm prandium fuerit, prorsus excussâ, toti se studiis atque consiliis committant. Infrequens & parca sit reliquo die cogitatio. Quos, spretâ lege hæc, juvat diesque noctesque chartis impallescere, quosque, vel dum assument cibos, non tædet rebus seriis implicari, hos infeliciter nutriri, miserèque contabescere fateamur non modò, sed & profiteamur necesse est; hos ipsos insuper si cernas magis ac magis ab assumpto cibo meditates ardua, cadere mente sæpiùs animadvertes; ut eisdem vel invitos oporteat antè consopiri quàm genuino fruantur acumine.

**N**E Q U E obest quod notavit Celsus, quibus caput infirmum est, iis *ne quidem* à cibo cogitationem esse tutam; quibus verbis innuere visus est, juxta nonnullos, cogitationem ut plurimum esse tutiorem à cibo. Me namque judice, hæc verba Celsi damnant prorsus à cibo cogitationem, qui etsi aptus videatur ad firmandam & roborandam mentem eorum qui capite sunt infirmi, ipsam tamen, statim atque sumptus est, necessariò confundit aut conturbat. Reverâ ubi, absolutâ coctione ciborum, sanguis expanditur unâ cum spiritibus recens excusis quoquoversum, ipsum caput cum reliquo corpore firmiter videtur evadere; sed, statim ab assumpto cibo, obscurum, confusum, turbatum, potiùs quàm validum & firmum ubique connotatur.

*Ergo à cibo non tuta cogitatio.*

Proponebat Parisiis HENRICUS BESNIER Parisinus,  
Baccalaureus Medicus. A. R. S. H. 1711.

---

Apud viduam Francisci Muguet Typographi Regis. 1711.